


## Spesies baru halia, begonia dan paku pakis ditemui di Taman Negara Batang Ai

Posted on May 23, 2011, Monday



**LUBOK ANTU:** Seramai 150 saintis dari Jabatan Hutan Sarawak, Akademi Sains Malaysia dengan kerjasama Universiti Sarawak berjaya menemui lima spesies baru halia, dua spesies Begonia (resam batu) dan satu spesies baru paku pakis semasa membuat kajian di Taman Negara Batang Ai, Nanga Delok di Sri Aman sebelum ini.

Menteri Sumber Asli dan Alam Sekitar Malaysia Dato Sri Douglas Uggah berkata, ini menunjukkan bahawa hutan rimba di negeri ini masih lagi banyak flora dan fauna yang perlu diterokai. Spesies baru ditemui ini mungkin berpontensi untuk dimajukan dalam bidang hortikultur, ubatan herba, kosmetik serta farmaseutikal, jelas beliau.

“Oleh itu inventori biodiversiti amat penting dan hanya melalui inventori kita akan menemui spesies baru serta menilai usaha-usaha pemuliharaan hutan kita,” katanya.

Uggah memberitahu berita gembira itu semasa berucap dalam majlis Pelancaran Pusat Kecemerlangan Konservasi Orang Utan dan Majlis Sambutan Hari Biodiversiti Antarabangsa di Taman Negara Batang Ai, Nanga Delok, Sri Aman. Pusat Kecemerlangan Konservasi Orang Utan yang bernilai RM3 juta ini terletak di Nanga Delok. Ia mula dibina pada 2008 dalam Rancangan Malaysia Ke-9 dan siap sepenuhnya pada tahun lalu.

Pusat yang seluas 200,00 hektar ini dianggarkan dihuni 1,984 orang hutan hasil kajian projek ITTO sepanjang 2003 hingga 2007 dan ia meliputi taman negara itu dan Santuari Hidupan Liar Lanjak-Entimau yang merupakan habitat semula jadi Orang Utan di Sarawak. Sementara itu kata Uggah, Taman Negara Batang Ai merupakan Taman Negara terbesar di rantau ini yang mempunyai kekayaan biodiversiti yang tinggi. Antara spesies ikonik yang ditemui di taman negara ini ialah orang utan, jelas beliau.

Menurutnya, Taman Negara Batang Ai adalah sebahagian kawasan ‘Heart Of Borneo’ merupakan satu inisiatif yang bertujuan untuk menguruskan secara berkekalan yang terletak di dataran tanah tinggi meliputi sempadan Brunei Darussalam, Taman Negara Betung-Kerihun di Kalimantan, Indonesia dan Malaysia (Sabah dan Sarawak).

Inisiatif Heart of Borneo di kawasan Sarawak meliputi kawasan seluas 2.1 juta hektar hutan merupakan satu usaha sama antara kerajaan negeri Sarawak dan kerajaan persekutuan dalam menguruskan sumber biodiversiti secara berkekalan dalam usaha memulihara biodiversitinya, kata beliau. Turut hadir dalam majlis itu Ahli Parlimen

Lubok Antu William Nyalau, Anggota Dewan Undangan Negeri (ADUN) Engkilili Dr Johnical Rayong dan Pengarah Jabatan Hutan Sarawak, Ali Yusof.

Read more: <http://www.theborneopost.com/2011/05/23/>